

॥ मृत्युञ्जयहोम-मन्त्राः ॥

अपैतु मृत्युरमृतं न आगन्वैवस्वतो नो अभयं कृणोतु। पूर्णं
वनस्पतेरिवाभिनः शीयतां रयिः सचतां नः शचीपतिः॥१॥
मृत्यव इदं न मम॥

परं मृत्यो अनु परेहि पन्थां यस्ते स्व इतरो देवयानात्। चक्षुष्मते
शृण्वते तै ब्रवीमि मा नः प्रजां रीरिषो मोत वीरान्॥२॥
मृत्यव इदं न मम॥

वातं प्राणं मनसाऽन्वा रभामहे प्रजापतिं यो भुवनस्य गोपाः।
स नो मृत्योस्त्रायतां पात्वहंसो ज्योग्जीवा जरामशीमहि॥३॥
मृत्यव इदं न मम॥

अमुत्र भूयादध यद्यमस्य बृहस्पते अभिशस्तेरमुञ्चः।
प्रत्यौहतामश्विना मृत्युमस्माद्देवानामग्रे भिषजा शचीभिः॥४॥
बृहस्पतये अश्विभ्यां अग्नये च इदं न मम॥

हरिं हरन्तमनुयन्ति देवा विश्वस्येशानं वृषभं मतीनाम्। ब्रह्म
सरूपमनुमेदमागादयनं मा विवधीर्विक्रमस्व॥५॥ ब्रह्मण इदं न
मम॥

शलकैरग्निमिन्धान उभौ लोकौ सनेमहम्। उभयोर्लोकयोर्-
ऋध्वाऽति मृत्युं तराम्यहम्॥६॥ मृत्यव इदं न मम॥

मा छिदो मृत्यो मा वधीर्मा मे बलं विवृहो मा प्रमोषीः। प्रजां मा
मे रीरिष आयुरुग्र नृचक्षंसं त्वा हविषा विधेम॥७॥ मृत्यव इदं

न मम॥

मा नो॑ म॒हान्त॑मु॒त मा नो॑ अ॒र्भकं॑ मा न॒ उक्ष॑न्तमु॒त मा न॑ उ॒क्षित॑म्।

मा नो॑ व॒धीः पि॒तरं॑ मो॒त मा॒तरं॑ प्रि॒या मा न॑स्त॒नुवो॑ रु॒द्र री॒रिषः॥८॥

रुद्राय इदं न मम॥ अप उपस्पृश्य।

मा न॑स्तो॒के तन॑ये मा न॒ आयु॑षि मा नो॒ गोषु॑ मा नो॒ अश्वे॑षु
री॒रिषः। वी॒रान्मा नो॑ रु॒द्र भा॒मि॒तो व॑धी॒र्हविष्म॑न्तो॒ नम॑सा वि॒धेम
ते॥९॥ रुद्राय इदं न मम॥ अप उपस्पृश्य।

प्रजा॑पते॒ न त्वदे॒तान्य॒न्यो वि॒श्वा जा॒तानि॑ परि॒ता ब॑भूव।
यत्का॑मास्ते जुहु॒मस्तन्नो॑ अस्तु व॒यः स्या॑म॒ पत॑यो रयी॒णाम्॥१०॥

प्रजापतय इदं न मम॥

यत॑ इन्द्र॒ भया॑महे॒ ततो॑ नो॒ अभ॑यं कृ॒धि। मघ॑वन्छृ॒ग्धि तव॑ तन्न
ऊ॒तये॑ वि॒द्विषो॑ वि॒मृधो॑ जहि॥११॥ इन्द्राय मघवत इदं न मम॥
स्व॒स्ति॒दा वि॒शस्प॑तिर्वृ॒त्रहा॑ वि॒मृधो॑ व॒शी। वृ॒षेन्द्रः॑ पु॒र ए॑तु नः
स्व॒स्ति॒दा अ॑भयङ्क॒रः॥१२॥ इन्द्राय अभयङ्कराय इदं न मम॥

त्र्य॑म्बकं॒ यजा॑महे॒ सुग॑न्धिं पु॒ष्टि॒वर्ध॑नम्। उ॒र्वारु॑कमि॒व
बन्ध॑नान्मृ॒त्योर्मु॑क्षी॒य माऽमृ॑तात्॥१३॥ त्र्यम्बकाय इदं न
मम॥

अप॑मृ॒त्युमप॑क्षुधम्। अपे॒तः श॒पथं॑ जहि। अ॒धा नो॑ अ॒ग्न आ॑व॒ह।
रा॒यस्पोष॑ सह॒स्नि॒णम्॥१४॥ अग्नय इदं न मम॥

ये ते॑ स॒हस्र॑म॒युतं॑ पाशाः। मृ॒त्यो म॒र्त्याय॑ हन्त॒वे। तान् य॒ज्ञस्य॑

मा॒यया॑। सर्वा॒नव॑यजामहे॥१५॥ मृ॒त्यव॑ इदं न मम॥

जा॒तवे॑दसे सु॒नवाम॑ सोमं म॒राती॑यतो निद॑हाति वेदः। स नः
पर॑षदति दु॒र्गाणि॑ वि॒श्वा ना॒वेव॑ सिन्धुं दु॒रिता॑ऽत्य॒ग्निः॥१६॥ अ॒ग्नये॑
जा॒तवे॑दस इदं न मम॥

भूर्भुवः॑ स्वः। ओजो॑ बलम्। ब्रह्म॑ क्ष॒त्रम्। यशो॑ म॒हत्। स॒त्यं तपो॑
नाम॑। रू॒पम॒मृतम्। चक्षुः॑ श्रोत्रम्। मन॒ आयुः॑। वि॒श्वं यशो॑ म॒हः।
स॒मं तपो॑ ह॒रो भाः। जा॒तवे॑दा यदि वा पाव॒कोऽसि॑। वै॒श्वान॒रो
यदि॑ वा वैद्युतोऽसि॑। शं प्र॒जाभ्यो॑ यज॑मानाय लो॒कम्। ऊ॒र्जं पु॒ष्टिं
दद॑द॒भ्याव॑वृ॒श्स्व॥१७॥ जा॒तवे॑दसे वै॒श्वान॒राय॑ इदं न मम॥

मृ॒त्युर्न॑श्य॒त्वायु॑र्वर्धतां भूः। मृ॒त्युर्न॑श्य॒त्वायु॑र्वर्धतां स्वाहा॥१८॥
अ॒ग्नये॑ इदं न मम॥

मृ॒त्युर्न॑श्य॒त्वायु॑र्वर्धतां भुवः। मृ॒त्युर्न॑श्य॒त्वायु॑र्वर्धतां स्वाहा॥१९॥
वा॒यवे॑ इदं न मम॥

मृ॒त्युर्न॑श्य॒त्वायु॑र्वर्धतां सुवः। मृ॒त्युर्न॑श्य॒त्वायु॑र्वर्धतां स्वाहा॥२०॥
सू॒र्याये॑ इदं न मम॥

मृ॒त्युर्न॑श्य॒त्वायु॑र्वर्धतां भूर्भुवः सुवः। मृ॒त्युर्न॑श्य॒त्वायु॑र्वर्धतां
स्वाहा॥२१॥ प्र॒जाप॑तये इदं न मम॥

॥ॐ शान्तिः॒ शान्तिः॒ शान्तिः॑॥



हरि॒ꣳ हर॑न्त॒मनु॑यन्ति दे॒वाः। वि॒श्वस्ये॑शा॒नं वृष॑भं म॒तीना॑म्। ब्र॒ह्म
 स॒रूप॑मनु॒मेद॑मागा॒त्। अय॑नं॒ मा वि॒व॑धी॒र्विक्र॑मस्व। मा छि॑दो मृत्यो॒
 मा व॑धीः। मा मे ब॒लं वि॒वृ॑हो मा प्र॒मो॑षीः। प्र॒जां मा मे॑ री॒रिष॑
 आयु॑रु॒ग्र। नृ॒चक्ष॑सं त्वा ह॒विषा॑ वि॒धेम। स॒द्यश्च॑क॒मा॒नाय॑। प्र॒वे॒पा॒नाय॑
 मृ॒त्यवै॑॥१॥

प्रा॒स्मा आ॑शा अशृ॒ण्वन्। का॒मे॒नाज॑नय॒न्पुनः॑। का॒मे॒न मे॒ काम॑
 आगा॑त्। हृ॒दया॒द्धृ॒दयं॑ मृत्योः। यद॒मीषा॑म॒दः प्रि॒यम्। तदै॒तूप॒माम॑भि।
 परं॑ मृत्यो॒ अनु॒ परे॑हि प॒न्था॑म्। यस्ते॒ स्व इ॒तरो॑ दे॒व्याना॑त्।
 चक्षु॑ष्मते शृ॒ण्वते॑ ते॒ ब्रवी॑मि। मा नः॑ प्र॒जाꣳ री॑रिषो॒ मोत॑ वी॒रान्।
 प्र पू॒र्व्यं मन॑सा॒ वन्द॑मानः। नाध॑मानो वृष॒भं च॑र्षणी॒नाम्। यः
 प्र॒जाना॑मे॒कुरा॑ण्मानु॒षीणा॑म्। मृ॒त्युं य॑जे प्रथ॒म॒जामृ॑तस्य॥२॥



generated on **August 25, 2024**

Downloaded from



<http://stotrasamhita.github.io>



StotraSamhita

Credits